

度

支

奏

議

度支奏議目錄

福建司二卷

題覆閩撫并科道暫留雜派遼餉一年應用疏

題請轉解 皇子誕育欽賞銀兩疏

題覆英國公張惟賢龍灣莊地管業疏

題覆錦衣衛都指揮方弘璣屯兵疏

申飭漕委解官及禁增物價疏

覆順天按院查出透支錢糧疏

題覆屯院羅元賓戚臣遞減贍田疏

題覆科道劄總梁子璠毛祥德屯田疏

閩省起解錢糧盡被奸委侵沒疏

覆屯曉李玄清釐屯政疏

題覆圖撫平夷用過錢糧疏

題覆捕營口糧鹽菜疏

進宮銀兩題 請寬限疏

度支奏議卷之二

太子少保戶部尚書淄青畢自嚴視草

題覆閩撫并科道暫留雜派遼餉一年應用疏
題爲直陳閩海情形敬畫定海長策以紓

聖明南顧之憂事福建清吏司案呈案查崇禎二年
正月二十三日奉本部送戶科抄出巡撫福建
右僉都御史熊文燦題前事內款開一日急催
兵餉閩海多事兵餉措處維艱既不敢忘請正
供又不敢加派百姓惟望額餉養兵按月支給

耳給早則無無貸息餉飽而用命給遲則半以
償息而無不宿飽此其關係何如乃怠緩有司
視此兩關考成缺額獨多臣今議以過季不完
者先行任俸年終不完者一併題察卽值考滿
准給繇至海寇游移靡定數十年來沿習已
久若欲盡掃餘氛必得錢糧數萬方可展布惟
望

聖明稍稍設法推恩等因本月十七日奉

聖旨據奏海上情形甚悉該撫調度有方條議各款

聽便宜行鄭芝龍餘黨既散便着從官兵勦賊自
効董鳴瑋准寬限事平優敘該部知道欽此又該
山西道御史王際逵題爲議撫之局未結制敵
之法宜周敬陳閩海近事仰祈

廟堂議

勅令任事諸臣預修制勝實算事內稱鄭芝龍就撫
之後欲爲我用之意屢見於効順矣乃數月以
來曾無半粒之餉但欲其自食自戰殺賊立功
能得其効乎竊見撫臣熊文燦極力擔當苦心

擘畫閩海事固無爲而其閩餉一事實費區處

惟願

皇上勅下戶部從長計議等因本月二十四日奉

聖旨該部從長確議具覆欽此欽遵通抄到部送司
兩疏內併責文武等款議撫制敵等議有隸
吏兵二部職掌者應聽另覆外其閩餉一事前
此諸臣請留正供遼餉節經本部覆奉

欽依不准留用此萬萬不容更議矣本部舍正供遼
餉之外別無可爲閩餉計者查崇禎元年四月

本部所覆閩撫朱一馮等海賊復來一疏內稱
罪臣俞咨臯吳淳夫賊以巨萬計俱奉

旨查追助餉而汀延各府俱有存留錢糧亦奉

旨暫行那借又鄉紳輸助業有同心西庫兵餉豈無
積積或再搜括各項存留節省各項公費併前
贓罰存留數定不資亦足以濟該省之急等語
今撫臣前疏亦稱既不敢妄請正供又不敢加
派百姓惟望額餉養兵等語是閩餉亦或不藉
本部別爲之計矣合無照撫臣之議題

請申飭有司額餉過季不完者先行住俸年終不完者一併題叅并停其陞考庶亦可稍濟緩急等因呈堂奉批准類覆又有馬掌科疏及熊撫院咨文仍移新餉司酌議併覆奉此備行付送去據今准新餉司付稱案查崇禎元年七月本部題覆山西巡撫耿如杞插會密遣奸細疏內稱并乞

勅諭福建撫臣募兵製器自行酌處不論雜項正項凡係遼餉通行完解不得輕留致悞遼事等因

奉

聖旨你部卽移文山西福建二撫臣地方緩急各自料理遼餉速行催解不得議借欽此欽遵咨行去後今崇禎二年正月該撫咨開天啓七年實徵新餉雜項銀止七萬一千九百兩二錢三分內除解過三千五百一兩二錢四分五釐實存六萬八千三百九十七兩九錢八分五釐已經前撫動支爲造辦製器召募之用等因該本部議聽該撫設處補解外其崇禎元年分銀火速徵

解等因咨覆去訖又該兵科給事中馬思理題
爲閩寇未除閩事堪憂謹接近日情形仰祈
皇上神謀制勝以奠海邦以保萬全事內稱目前急
着惟在議餉雜派一項比正供差可轉移聞舊
撫臣已用其半今所餘有幾竊以量留雜派一
年便可措手不致坐困不識司計者何恡而不
爲此等因奉

聖旨海寇未靖急須相機剿平鄭芝龍着從官兵立
功自効不得募兵索餉貽害地方澎湖撤兵移餉

并董應舉果否有功聽該撫按酌行看奏該部知道欽此欽遵抄出到部送司看得雜派一項原補加派之不足是雜項亦遼餉無可轉移者也况加派或有壓徵之名雜項實爲見在之物先該本部題奉

欽依該省遼餉不論正項雜項一槩不准輕留矣乃該撫咨稱七年分雜項錢糧先經舊撫動用本部酌量回覆聽其設處補解俱各遵行在案今馬掌科念切海邦請留雜派一年以餉閩誠權

宜濟急之苦心或無准將該省七年分雜派准
暫留一年姑俟事平補解其六年以前并崇禎
元年以後正項雜項該省務遵

前旨火速徵完解部餉遼萬勿再以壓徵爲詞而致
誤三韓之額餉可也煩爲查照題覆等因併付
到司查得閩撫熊文燦與臺臣王際遠議處閩
餉一事前該本司呈堂批允移付新餉司與科
臣馬思理疏酌議併覆今新餉司付議已妥本
司無庸另議相應呈請酌覆通查案呈到部該

臣等看得連年閩撫與臺省諸臣累疏請留正
供遼餉臣部曾未准從去歲四月彙覆閩撫海
賊復來一疏所議最爲詳確而九月又覆晉撫
揔密遣奸細一疏奉

旨尤爲諄切卽今歲正月閩撫咨開前撫用過七年
分雜項遼餉臣部尚回咨催其設處補解始終
不敢輕議准留夫豈不念閩事關係之重閩餉
措處之艱哉第以遼事關係尤重遼餉措處尤
艱不得不然耳今撫臣熊文燦已知臣部之難

處而惟望

聖明稍稍設法臺臣王際達亦諒臣等之苦心而責成臣部從長計議臣等竊惟天下財賦止有此數諸司灌輸總在額中稍或那東補西必至掣衿露肘正供原屬額需加派專爲遼用必不能爲閩而留甚明也舍此之外又何能爲計哉科臣馬思理桑梓計深謂量留雜派一年便可不致坐困且據該撫來咨謂此項前撫已經動用臣等勢難復愆似今日不得不聽其暫留而事

平猶不得不責其補解者也此則一時之權宜也若夫計長久則閩海諸兵原有額餉在平時儘有盈餘聞先年閩庫曾積至三十餘萬惟今值多事且有司因其不入考成玩視坐逋動至不足耳應如無臣所議立考成法責令有司蚤解時給俾免貸息而得宿飽此不特養兵之要道亦爲政之正體也相應覆

請恭候

命下臣部移咨福建巡撫將該省天啓七年分雜派

遼餉實存銀六萬八千三百九十七兩九錢
分五釐准暫留爲造船製器召募之用俟事平
卽行照數補解其六年元年前後雜項盡行起
解不得那用分毫仍立考成之法申飭有司將
該省額徵兵餉按季徵解過季不完者先行住
俸年終不完者一併題參照本部題

准新例降罰本部仍咨都察院轉行福建巡按御史
一體遵奉施行

崇禎二年三月二十八日具

題四月初四日奉

聖旨遼餉原不許輕留念該省海寇未平天啓七年
雜派先經舊撫支用准借一年事定照數補解其
六年元年前後並不許那用該省額餉務着按季
徵解不完的依議題叅重處你部便移文該撫按
一體遵行欽此

題請轉解 皇子誕育欽賞銀兩疏

題爲欽奉

聖諭事福建清吏司案呈案查崇禎二年三月十六日奉本部傳該本部會同太僕光祿二寺順天府等衙門於

文華門接出司禮監太監高時明等傳奉

聖諭戶部等衙門朕以皇子誕育布慶中外念在京軍役人等首宜頒賞內帑匱乏宮中喜事等用摻括殆盡查照舊例取太倉銀三萬四千兩太僕寺

銀二萬兩光祿寺銀一萬兩順天府稅契等銀一萬兩進用着各遵諭奉行欽此欽遵恭接到部除

原奉

聖諭具題

進繳外合諭該司查行等因到司隨經呈堂劄太倉銀庫卽備銀三萬四千兩聽候

進用去後又該本部諭令暫於漕折內借用後於京邊內補之并劄行兌明收貯作速報部以憑立等奏報

進用等因去後適值給放京軍折色月糧例動漕
折銀兩支用不敷案候外解間今查有直隸蘇
州府解到漕折銀兩堪以暫借除另行該庫兌
明聽候外又據光祿寺呈稱遵於三月二十六
日會同巡視科道將本寺庫貯膳膳銀秤兌一
萬兩見在呈乞類題等因又該戶科抄出順天
府署府事通判高鏞題稱

欽定銀一萬兩竭蹶辦完乞

勅該部照數查收等因奉

聖旨該部照數查收欽此今本部借完前銀合無題
請定奪案呈到部恭照

皇嗣誕育慶溢普天

恩命覃宣歡騰蔀屋臣部雖值萬分匱詘之時然何
敢不勉力奏處以遵

勅諭以襄

大典謹令該庫將解到漕折銀內暫借三萬四千兩
見在及查前此

欽賞臣部惟與各衙門措辦應出銀兩其坐派應賞

名數原屬禮部差官領銀給散原屬兵部皆非
臣部所得干與今恭誦

聖諭內進用二字似應解

進內庫查收然先次

登極皇賞

欽發帑銀八十萬兩尚

勅臣部領出收貯轉發兵部差官領解今順天府

奏報奏完派出銀一萬兩又奉有該部照數查收

之

旨是臣部與各衙門銀兩似均應

勅令兵部查收并

勅令禮部坐派應賞名數請

旨給賞并臣等所敢越俎擅議者也相應題

請恭候

命下臣部轉行太倉銀庫并光祿寺順天府各將措
辦見在銀兩及太僕寺催完應出銀兩各遵奉
轉解兵部查收施行

崇禎二年四月十六日具

題本月十九日奉

聖旨是着兵部照數查收欽此

題覆英國公張惟賢龍灣莊地管業疏

題爲勲產被占已久豪民情愿退還謹遵

旨指名更正懇乞

聖明俯准歸業以便仰輸

國課事福建清吏司案呈崇禎二年三月十六等

日奉本部送戶科抄出巡按直隸等處監察御

史羅元賓題前事內稱奉都察院勘劄准戶部

咨該英國公張惟賢奏前事等因移咨備劄前

來案行密雲道確查去後屢經行催今據兵備

副使許如蘭呈據寶坻縣申稱查得龍灣等莊地歷詢人言兼查碑碣其爲英府舊業的無可疑合無照該爵原題每畝二分起科以一分濟邊一分養贍候奉

旨之日照數起解令該爵赴部自領可也又照此項昔年固備邊地今天津部院催解更乞轉詳免行助餉再查英國原題三百五十頃今龍灣等莊開荒止三百三頃其劉臣等莊四十七頃入冊已久見有定額徵銀如除去則缺額何補似

應令更名納糧等緣繇申詳到道看得龍灣等莊地土旣爲該爵遺地自應復還該爵惟屯租二分起科先蒙督餉部院題

准歸餉今蒙本院疏改歸邊相應遵照近題歸邊之議該爵欲留一分以爲養贍而納稅一分助

國已見急公第可否准從應聽本院及計部提衡其劉臣等莊四十七頃雖經入冊已久然旣係該爵舊業應准并還已蒙本院撫院批定該縣慮及缺額而復以更名納糧爲請應否依從俱

聽候本院定裁奪也等因呈詳到臣又准該爵
揭稱前項地土奉

旨查明具奏者惟令查此地果是爵地否耳今既經
再四查明是爵之地卽當歸爵自行管業收租
解課何必復煩該縣之催徵計部之轉給乎且
前此自行管業之例具有成規非創自爵始也
查凡諸勲戚自置祖產皆自行管業收租無擾
於

公家無損於私室最爲簡便切當除天啓六年聽

本縣另徵外其天啓七年奉

旨之日原題以本年爲始俱應聽爵自行徵租輸課
至於尚有餘地載在家冊亦應按址查還無容
影射復生更祈早賜題覆通行等因該臣會同
巡撫順天右僉都御史王應豸巡按直隸監察
御史陳睿謨看得寶坻縣龍灣等莊地據所存
碣文乃英國先世自置產業也惟是地多途阻
付託不得其人歲久世更疆理漸非其舊致令
積佃久假好民混爭而地上遂不知其幾易矣

今英國公張惟賢據碣根尋得其遺址各戶處
非其據自願退還臣等遵奉

明旨檄行該道有司詳加查考既有先年確據則物
歸舊主自是理勢宜然既係祖產相傳則自行
管業似亦往例應爾其地原屬開荒其賦原非
上則畝止科租二分舊案尚有可考若復爲加
增則佃民益苦非仁政所宜行若槩歸濟邊則
養贍仍虛非復業之初意據該爵原疏不敢盡
有其租而請以一分濟邊一分自贍似亦急公

一念合無准從聽其管業輸課自天啓七年奉
旨之年爲始邊地仍歸邊額臣前查

景府遺地一疏業已題明矣其先此題入屯租相
應除豁若夫天啓六年以前地屬各戶

王府所不盡徵該縣所不及問者今亦當令該縣
清查追究以明法補課也等因又該順天巡撫
王應豸巡按陳賡謨各題同前事等因本月十
二等日俱奉

聖旨戶部知道欽此欽遵抄出到部送司案查天啓

七年二月內本部題覆天津督餉部院咨議屯
租疏內稱寶坻縣開荒地三萬三百八十七畝
每年屯租銀六百五十五兩五錢等因業奉

欽依咨行訖本年十一月內該太師英國公張惟賢
奏稱祖遺莊田三百五十頃坐落寶坻縣龍灣
地方緣臣父蚤世奸豪乘機侵隱近臣訪知具
奏諸惡到京出首情愿退還但前地原係拋荒
不起

國課今當置之之時願自天啓七年爲始每畝一

分起科以克邊餉等因奉

聖旨這寶坻縣退還地三百五十頃還着該撫按查明具奏該部知道欽此欽遵咨行該撫按屯田御史查明具奏去後崇禎元年七月內屯田御史羅元賓題報清查

景府遺地疏內稱龍灣等莊地三百三頃以久屬拋荒之故投入屯局科租助餉然此地實先年備邊地也所當仍歸備邊者乃近日英國公張惟賢又疏稱此地爲其祖業奉

旨查議當俟查確報到之日另行會題等因該本部覆奉

欽依在案今該前因通查案呈到部看得英國公張惟賢所奏祖遺地土坐落寶坻縣龍灣等莊向緣委托匪人致被奸佃侵據詭爲無主荒田近聞該爵覺察始投天津屯田咨議科租助餉今撫按屯田諸臣與該道有司詢人言據碣文再三駁查俱已明確既係該爵祖產似應歸還原主其地每畝原科租銀二分今以一分聽爵養

贍一分解部濟邊于埋于情似亦平妥地既查
明歸爵管業前議屯租委應除豁該爵原地三
百五十頃今歸爵者止三百三頃尚有劉臣等
莊四十七頃該縣入冊已久解部備邊有年若
復改更缺額無補且當此艱匱至極土壤細流
皆足以助高深該爵憂

國有心諒不復恡忝也既經諸臣會題前來相應
依議覆

請恭候

命下臣部移咨順天巡撫及咨都察院轉行巡按屯
田各御史行令寶坻縣將查明英國公原業龍
灣莊地三百三項自天啓七年分爲始聽該爵
管業每畝原科租銀二分內以一分解部濟邊
一分聽該爵養贍天啓六年以前未經科租年
分另行確查

奏報其劉臣等莊地四十七項仍照舊額徵解備
邊本部仍咨天津督餉部院將原議前地屯租
銀六百五十五兩五錢除豁施行

崇禎二年四月二十日具

題本月二十五日奉

聖旨是欽此

題覆錦衣衛都指揮方弘瓚屯兵疏

題爲奴虜近有叵測之形兵餉宜求長久之策謹
申明前請併膚陳末議以祈

聖裁事福建清吏司案呈案查崇禎二年正月十九
日奉本部送戶科抄出錦衣衛堂上僉書管北
鎮撫司掌刑事都指揮同知方弘瓚奏前事內
稱臣前疏請亟復京屯已經部覆甚詳伏乞

皇上查取戶部覆疏并當年屯舍李大用與科臣郝
敬劉道亨等疏

俯賜省覽便從今做起爲兵食長策并遵

祖制復京屯實衛伍可以強兵可以足餉等因本月
十二日奉

聖旨屯政宜復方弘璜前疏已經部覆着再酌議具
奏東西情形及兵餉設處知道了該部知道欽此
欽遵抄出到部送司案查天啓三年九月該本
官奏爲時事已急屯軍宜復等事內稱我

成祖文皇帝靖難功成剩精兵四十八萬內選十二
萬爲京營餘三十六萬給賜地土令自耕食原

備有事聽調征剿今其人俱在若令仍返爲屯
每三十丁抽選勇壯一名爲軍其餘每丁貼銀
五分作正軍月糧就於

都城內外適中阨塞處所立爲營伍練爲遊兵通
班耕守不費帑藏不煩轉輸不勞徵調不礙屯
院不妨有司不拂人情丁計餉寓兵於農將
一勞永逸豈惟濟一時危急之權實貽萬年無
疆之利伏乞

勅下覆議

簡命臺省一員清理各項屯伍冊籍分別軍民及將領器械等事數月之間必得精兵萬餘庶軍稱實用餉爲有備等因奉

熹宗皇帝聖旨屯軍舊制且曾經條陳這所奏該部便叅詳議覆欽此又據興武衛指揮等官李壽春等揭稱方弘瓚疏業已詳悉第事在今日類多掣肘若非力爲決斷清楚何日富強何策等因該本司看得前疏誠富強上策第不知於各衛有無紛擾屯丁果否樂從且以屯丁屯田固本

部事而以屯丁從軍實兵部事似當移會酌議
具覆等因呈堂備咨兵部會議去後又據屯舍
劉金等刻揭內稱金等先世俱係靖難官軍

欽賜屯地令自耕食以備緩急當萬曆十九年寧夏
反叛指揮高慎行屯舍李大用等有不費官錢
情愿効力一疏適值事平而行之失策止徵丁
銀不聞訓練昨奉

恩詔豁免而各屯徵收猶故何若急復

祖制更爲長策等因到部併行咨議未覆至五年九

月又該本官奏爲再申屯軍

祖制兼陳兵食遠圖等事奉

熹宗皇帝聖旨旣已下部當候議覆該部知道欽此
併咨兵部酌議本年十月又該貴州道御史楊
春茂題爲恢復宜求長策等事內稱京屯之復
其當行有三可免逃逸之虞歲又省新餉數十
萬兩外可作山海後勁內可爲

京城捍護橫行之草寇無容其焚劫無制之客兵
亦難恣其驕縱卽東西虜知亦可寒其內犯之

膽夫以可行之法當不可不行之時一呼而得
實兵數萬坐派兵食兩利之效更何憚而不爲
伏乞

勅部將方弘璣加銜督理屯政等因奉

熹宗皇帝聖旨京屯之復既有三便卽着該部酌議
行欽此仍咨兵部會議至六年正月該兵部咨稱
今日所最急所最難者無如兵與餉方弘璣乃
能不煩召募不費錢糧集兵萬餘以守禦而兼
屯練果爾何憚不一試之然必彈壓得人批導

得解便於軍更便於民經久可行乃稱良法此
在貴部自當從長酌議等因該本部看得古者
募兵或用土著或用餘丁而今則烏合流移故
其勢易潰古者屯田卽係見兵卽係戍地而今
則買地雇役故其費不貲若夫以屯丁爲兵以
丁銀爲餉卽以此兵爲屯而不潰不費可守可
禦則惟衛臣方弘璦之議爲兩得之據其先後
疏揭所陳八便皆鑿鑿可行屯衛官軍又合詞
踴躍而今臺臣楊春茂又條議三便極言其爲

恢復長策亟請將弘瓚加銜督理若謂不可一日復遲者至樞臣回咨亦甚以此舉爲富強之策抑今日之兵與餉視前日更難與其東徵西調徒滋騷擾安家行糧徒糜厚貲孰有如有加兵而兵存不費餉而餉足者則試一爲之亦何不可事之不成諒無所損若其成則裨益多矣業奉有卽着該部酌議行之

旨正值此兵餉兩窮之日疆場用武之秋尚可不亟爲力行而使事機坐失哉弘瓚旣備悉其詳必

能克底其績然必委任重而後責成專臺臣力
薦其智謀識力表表可見合無卽如其議以弘
璣加銜專任其事而責其成功俟抽選既定或
如臺臣議填補薊鎮缺額之數或於適中阨塞
處所立爲營伍練爲遊兵以資關門緩急之需
至於經理條目之詳并所請重臣則在衛臣任
事後徐爲條畫方略俱聽與屯田御史參酌而
行總之此一事當令屯臣職其要衛臣職其詳
臣部茲未能懸擬而縷陳也恭候

命下臣部移咨兵部將衛臣方弘璣卽加以本衛應
得職銜請給

勅書關防前去駐劄通鎮舊署等處督理各衛屯丁
事務抽選屯軍派徵丁銀先將各數目速行造

冊奏

請定奪仍咨行屯田御史一體遵奉等因於本年二
月內具題奉

熹宗皇帝聖旨屯軍宜復

祖制卽着屯田御史等酌便宜行方弘璣不必遣該

部知道欽此欽遵咨行去後本年十月內該屯田御史何廷樞題爲京屯修復不易目前掣肘實多等事內稱各衛屯丁佃種屯地辦納屯糧應當屯差是其分內之事乃有司繁以民差苦之各丁不勝憤激其意若曰與其竭吾脂膏以供非分之役孰與出其死力以報效

朝廷之爲得故有出軍效力之議其揭稱各屯丁銀征收猶故者蓋不敢專指有司而借衛官發端耳其實丁銀奉

臣等免無敢再征矣方弘瓚心懷憂

國志切請纓謂各衛見戶不下數十萬以三十戶
出一軍卽可得萬餘軍以三十戶餉一軍卽可
得萬餘軍之餉兩疏陳

請條其八便而臣同官楊春茂亦謂京屯之復其便
有三卽樞部之移咨計部之覆疏亦皆以兩臣
之議爲是臣以屯爲職敢不黽勉以從但

明旨云便宜行而又先之以斟酌者豈非以不斟酌
則不成其便宜而欲便宜則不可廢斟酌乎臣

嘗斟酌之酌之矣人情時勢之間儘有一二可商者蓋屯丁之苦民差其事則同而屯丁之願出軍其意則不能盡同今以數十萬戶選萬餘軍固似易得然一軍歲餉最少亦得十二金據議應派之三十戶則每戶亦得歲出銀四錢較之先年屯丁之徵已覺倍蓰一二富饒之家藉此得免民差出之似易而家無寸土貧苦無賴者實多彼朝暮食力之不暇寧能歲辦如許且歲餉以十餘萬計當屬何處收貯當委何官支放

此軍着伍一月此餉卽不可中斷一日而屯丁
之消長難期儲科之盈縮難定卽使時和年豐
猶慮接濟無術矧海值災荒在在告罄告折極
稱催督之難目前動輒掣肘又何以善後而永
無敝乎部覆謂聽臣參酌

皇上亦遂令臣斟酌便宜行

聖意實深遠矣總之臣爲督察之司而非躬親之任
藉令得行亦僅可與聞於徵餉而決難越俎以
觀兵此臣所以展轉躊躇深思極慮期期而不

敢輕舉者也如謂此議終難泯滅衛臣方疏
慷慨當竟其用更新

勅下戶部會同兵部各簡司官一員與弘璣再加斟酌講究便宜諒諸臣自能別運方略而京屯之局或易結矣等因奉

熹宗皇帝聖旨戶部知道欽此隨經備咨兵部再加斟酌講究去後至今未經回咨今方錦衣復奏前因奉有着再酌議具奏之

旨合無再咨兵部酌議等因呈堂奉批移咨兵部再

行酌議奉此呈堂移咨去後今准兵部咨稱再
看得今日兵譁餉匱苟有濟於邦政而不拂於
人情何所顧忌而尚存猶豫如屯丁徵兵之議
先經郝劉兩科臣言之近日方錦衣之八便楊
臺臣之三便併本部原議戶部覆本旣鑿鑿可
行計不再決如彼復按先年屯丁李大用指揮
高慎行等之疏及近年衛官李壽春屯舍劉金
等之刻揭其苦於民差願圖報效欣欣踴躍又
如此此一役也以屯丁爲兵以丁銀爲餉而卽

以此兵爲屯不費

朝廷一錢坐獲精兵滿萬無逃無謀可戰可耕無一
不可行者獨屯臣何廷鑑見謂難行亦是慎重
之意但謂三十戶養一兵每戶應出銀四錢恐
貧富不均窘者難措夫免其民差所損豈在四
錢上下三十舊戶每戶豈止一家一人如一戶
有十家則每家止出銀四分矣彼浮於十家之
外裒其有餘不可濟貧寡之乏乎按弘瓚原疏
於三十六萬戶中拋却六萬以算選丁絕戶則

其計此三十萬戶者未嘗不寬也又謂錢糧收貯何地支放何人夫今日正憂無錢糧耳有錢糧而憂無收貯無支放乎但得戶戶願輸何必庫藏此三十萬戶者近在

畿輔卽令各戶按時餽給如或愆期有屯官之追呼在彼既避民差而願輸豈其惜小費而梗法也又謂催科盈縮難定凶荒接濟可憂夫出之爲三十戶之兵還之仍三十戶之人縱使一時凶荒游臻錢糧不接亦有籍可歸非比召募卽

不爲利何至爲害况未必三十戶而盡凶荒也
以自有之餉養自有之兵若得壯丁萬人駐劄
通州練爲遊兵東可應奴西可應插中可壯

神京之聲靈更選廉能心計之將二員一司團練
一司屯牧五千人輪班操演五千人輪班耕種
將天津一帶曠土量給牛種開墾爲屯則三年
之後新屯積穀又可餉萬人矣目前得不費餉
之兵一萬則他鎮可汰糜餉之兵一萬增兵而
適以損餉真富強上策萬不必疑者第數年難

行者魏崔之時豪家之占屯旣多恐清屯丁而漸清屯田今非其時矣合無依貴部前議覆請皇上特簡科道官一員查屯丁冊籍分別軍民如以軍受民產者毋得一體免差爲民間困至選將派餉等事請奉

明旨着實舉行足食足兵所濟不小矣等因咨覆前來奉堂批該司查議題覆奉此通查案呈到部
諺臣等看得今天下事勢所稱最重大最艱難者無過兵與食

聖主宵旰憂勤羣工畢智論議求其所以足之之道
未能也而衛臣方弘瓚京屯一議乃能令兵食
兩足有利無害斯亦今日所當決計亟行無復
疑沮者矣備閱前臣部尚書李起元覆疏與歷
來臺省條議兵部咨議皆反覆周詳已確見此
事爲富强上策而合詞力請

明旨業謂軍屯宜復

祖制卽着屯田御史斟酌便宜行是亦非謂此事不
可行與不必行也但彼時屯臣旣已奉

則亦不得不加詳慎觀其疏所稱臣爲督察
之司非躬親之任僅可與聞於徵餉決難越俎
以觀兵數語蓋亦非謂此事果不易行第不欲
獨肩此任故有再加斟酌講究之

請耳然今兵部回咨已一一講究明白凡屯臣之所
疑以爲難者樞臣皆已明見其易矣况當日兩
部成議具存今值此兵食兩窮計畫無復之日
尚安可狃於因循而不爲力行哉今查薊門方
議清汰新兵以省糜餉而又深虞

國步艱難邊備空虛若得此措餉自養之兵可萬餘人居中訓練於以備征調而供策應內壯

神京之聲靈外寒東西之虜膽則兵威自振有事俾荷戈從戎無事令力農自給則屯丁無擾較之烏合之衆頓覺霄壤懸矣臣竊以爲此舉深合前代兵農合一之規

祖制軍屯相資之法誠計之得者也第天下不患有難行之事而患無任事之人樞臣議請

特遣科道一員欲藉風憲以資彈壓又欲更選廉能

心計之將二員分司屯練俾令輪班操演更番耕種誠爲有見及查京屯原屬屯田御史經營則督察乃其職掌似有不容他譖其責者也但屯臣司屯而不便觀兵前已言之則京營科道二員或擇一專任或照例兼轄亦正可資彈壓者也此外無煩再設科道以滋繁費矣至於廉能心計之將想樞臣夾袋中當自有人亟宜遴選而錄用之於以壯貔貅之勢而奏富強之績此又兵部之事而非臣部所敢越俎者也兼以

事關重大其中或有未盡事宜不妨從長酌議
歸於至當伏乞

聖明俯加詳察

勅下兵部再一酌議覆奏卽爲題

請科道督察將領管理着實舉行其於兵屯二事必
大有補濟矣

崇禎二年閏四月十三日具

題本月十六日奉

聖旨這款議京屯抽貼成軍果出屯丁自願不願給

餉久遠可行豈非善策但三十六萬戶隸何州縣
冊貯何處原賜田土若干坐何地方現供何項錢
糧還着方弘璚備悉奏來中間有無利弊然後設
法經理該衙門知道欽此

申飭濫委解官及禁增物價疏

題爲奸弁解納久逋完補無期乞行懲治申飭以杜援比以免侵延事福建清吏司案呈奉本部批據本司呈稱查得真定府該天啓六年分供用庫芝蔴於本年十一月初七日差神武右衛經歷吳文海領解訖直至崇禎元年五月二十九日方始投文到部是已逾一年零七箇月從無延緩至此極者也據

內府供用庫手本吳文海原解芝蔴四百一十石

除收過三百三石尚欠一百七石本官復於八月二十九日造通狀乞增價九月內又告堂乞比例增價續告給假俱批司查明呈堂限兩箇月領銀回納今經九月行催四次杳無下落近據真定府呈報將原欠芝蔴增價銀三百二十八兩本年三月二十一日給付本官赴部完納今兩月餘亦無下落又查得福建布政司該天啓四年分本色蠟茶委官福州右衛指揮鄭應登天啓六年十一月二十二日領解直至崇禎

元年正月二十九日方始投批到部已逾一年
零三箇月亦未知其何情也據供用庫手本鄭
應登原解黃白蠟芽茶葉茶共一萬六千一百
五十二斤除收過一萬三千九百六斤尚欠二
千二百四十六斤本官復於本年七月內呈堂
比例乞找領原扣蠟價批司查明呈堂批准領
一半該銀五百六十九兩八錢七月初七日移
咨福建巡撫并照會該布政司本官自去赴領
留家人鄭大代比無非欲其速回完納也至今

又幾一年亦無下落四月二十四日前任司官
呈堂二十六日已經移文福建布政司催儹去
訖夫二官之領批起解也查各經二年而方始
到部其增價領解也又幾一年而茫無踪跡天
膽神奸一至於此再照二官皆武衛非候缺首
領則竊名盜銜之棍徒耳一官或已虛假差委
那有實效又查得福建鎮東衛經歷唐翀天啓
四年十二月內除領解本色蠟茶等項已完不
開外尚有天啓元年分本色顏料一批該正價

銀二千八百三十兩零久不投納再查福建千
戶劉茂根陳尚贊領解天啓三四年顏料兩經
題叅至今未到此差衛官武弁不效之明驗也
合無今後錢糧嚴禁指揮千百戶并候缺經歷
及倉巡等官不許領解止許差府州縣佐貳彼
以居官爲重卽時刻不肯遷延此革弊完公之
一大端也再照各領增加宜禁此端一開人人
觀望一批方到無不互誘援例紛紛告增卽本
足亦稱不足無欠故爲掛欠觀各呈詞口口比

例件件觀樣而知其皆詐也此後若一舉嚴禁
所納未有不卽完者也且告增之價若重派民
間則非法卽係原扣之價彼扣於發解之時想
各有據此增於交納之後止憑口稱事體參錯
各各礙手非體也等因呈奉堂批委解錢糧武
弁候缺最不宜用此極有見至於各價增加不
知起於何時今遂比例陳請濫觴無已茲宜通
行申飭但起解本色物料時如果價值不敷卽
於起脚地方告增如不增者卽係原不應增抵

京之日本部惟有督催完納已耳決不准其告
增告歸爲延捱侵冒之地也具稿題行奉此案
呈到部該臣等看得本部

內供外餉所以康濟軍

國者惟藉此省直之額賦省直頭會筭歛所以轉
輸本部者惟藉此承委之解官解官之任亦甚
重矣錢糧計千計萬付之眇然之一身完欠或
僞或真憑之批廻之一紙今福建指揮鄭應登
所解蠟茶真定府經歷吳文海所解芝蔴一批

屢催四經年月任延捱而充谿壑尚謂目有三
尺哉所當與先叅經歷唐种千戶劉茂根陳尚
贊一並移文亟催押解到部上緊完納仍究以
應得之罪者也至於物料徵貴徵賤本處司府
向有定額且解官初領解時豈不熟知何至到
京始紛紛告增告歸以恣其延捱侵冒之弊哉
先是臣部前任尚書郭允厚曾經條陳議禁本
色增價發揮甚明釐革甚力已經奉有

明旨乃申飭未幾而旋復馳騫矣所當力杜以防冒

濫者也既經該司查呈前來相應題

請恭候

命下臣部咨行福建保定各巡撫將解官鄭應登吳文海金先經二次題叅唐猷劉茂根陳尚贊各亟催押解到部完納仍行從重究處臣部仍通行各省直撫按申飭以後起解錢糧務委廉能府佐及州縣佐貳官不得濫委指揮千百戶并候缺經歷及倉巡等官以滋前弊其本色物料務照時值公平估給不得聽其到京告增致

開侵遲之弊庶完解不愆緩急有濟矣

崇禎二年五月初四日具

題本月初七日奉

聖旨是欽此

覆順天按院查出透支錢糧疏

題爲甘雨旁敷民情胥悅謹據申報以仰慰

聖衷併採民艱以益溥

天休事福建清吏司案呈崇禎二年閏四月二十八
日奉本部送戶科抄出巡按直隸監察御史陳
睿謨題前事內稱竊謂錢糧透支不清累民也
郊圻盜賊不緝累民也召買草豆不止累民也
夫三輔州縣十餘年來兵馬調募之往來衣糧
器甲之輸運米豆草料之湊給地方用度日新

度
條鞭舊額如故不得不權宜預支以濟目前顧
今年透明年透積透以至今日本年額派幾成
烏有矣據臣所知灤州透至一萬一千零景州
透至一萬零通州透至一萬八千零遷安縣透
至八千零吳橋縣透至七千零其他州縣未可
殫述夫下年抵上年之解後官代前官之罰已
自不平矧賦役定不得不取之額外考成急不
得不借之民間而里甲乘溷以作奸吏胥效尤
以中蠹又其必然矣臣謂亟宜令合屬一槩清

查始於何年經於某官用於某項當開除者開
除當追究者追究當處補者處補明明白白責
令見任各官抵充以何項截住以何年庶當官
之徵收不涸民間之私廩一清則以杜透支今
日救民一急務也開平士馬雲集芻糧急需悉
派民間買運自民間買運而困踣于舟車之側
者不知凡幾矣順天河府屬止派米豆而無
草束其齎運俱從水陸而鮮及車牛事稍易辦
然有一番灑派便有一番使費民間已苦難言

若永平府六屬歲買豎四萬石草一百八十萬束二年分減去草八十萬束則督師袁崇煥爲永民甦累耳豆每石官價六錢聞民間包貼多至一兩二錢不止者早解亦類是彼中議官買議官運鑿鑿可行而竟成道傍之築不知何故買價取諸官帑無稱貸之息一便也秋月物產價賤市集平收二便也計里出驢頭計程給腳價歲晚務閑而人樂趨三便也私包各棍向與軍丁通同買空票而無寔解官運無之四便也

稍不便于官則價料出入不無瑣屑紛糾之擾
然而幕僚佐貳季老皂壯皆堪分任官不便者
無幾而民間之大不便去矣況遼難一日未平
買運一日未已擇利務大不可不思則以禁僉
派今日救民一急務也伏乞

皇上俯採臣言將會屬遞交錢糧行臣等衙門早爲
清理其黃村堡等處照弘仁橋例選擇把總一
員移駐以資防禦至民間遼餉之召買驛站之
稽覈宜盡求長便以與民休息等因本月二十

三日奉

聖旨奏內清透支諸款深於恤民弭盜有裨悉如議
有該部議覆者卽與議覆其南京衙門并解等項
着與申飭頭站舡夫勒索嚴加禁革該衙門知道
欽此欽遵抄出到部送司查得疏內各款除黃
村堡等處移駐把總驛站稽覈宜盡求長便及
南京衙門併解頭站舡夫各一節俱係兵部職
掌應聽另行議覆申飭又遼餉召買係新餉司
職掌應將原抄付議其各屬透支錢糧一節原

疏請行臣等衙門早爲清理而

明旨已稱如議似不必議覆合無咨行順天巡按衙門清理等因呈奉堂批該司會同新餉司查議透支亦當議覆等因奉此卽移付新餉司查議去後今准回稱查得召買遼餉歷年本部俱憑督餉部院預計派定數目分定州縣本部斟酌其間畧加損益如數發價而事畢矣若官買官運有便于民無損于

國誠爲救時急着應務咨督餉部院并各該撫按

商確一官買之法庶幾宜民情因土俗可免滯
碍難行之虞事關軍糈未敢以冥冥臆決也煩
爲查照議覆等因到司案呈到部看得租賦原
有定額錢糧豈容透支雖稱一時權宜終是相
沿弊政今灤景等州縣或以千計或以萬計非
困於軍興則糜於驛站旣滋弊竇且苦民生愈
久愈多將何底止誠應如按臣議通行徹底清
查杜絕以節民財者也再照均徭已入條鞭召
買似爲橫派卽使價無賠費尚苦力難轉輸勞

永平之六屬官給六錢民賠強半旣竭其力復
朘其膏嗟彼窮黎何堪重困所當如按臣議酌
定官買官運良法以甦民力者也旣經題議前
來相應覆

請恭候

命下臣部移咨都察院轉行順天巡按御史將所屬
州縣透支錢糧一節清查始於何年經於某官
用於某項當開除當追究者追究當處
補者處補從此方爲杜絕臣部仍咨行督餉部

院并順天保定各撫按將召買遼餉官買官運之法酌議妥確作速報部覆

請定奪施行

崇禎二年七月初八日具

題本月十一日奉

聖旨灤景等州縣透支錢糧逾萬恐有影冒情弊着巡按御史嚴加查覈具奏遼餉官買官運行督餉撫按確議尤不許衙蠹因公擾民該衙門知道欽

此

題覆屯院羅元賓戚臣遞減贍田疏

題爲酌議戚臣遞減贍田以遵

祖制以裕

國計事福建清吏司案呈崇禎二年閏四等月二十七等日奉本部送戶科抄出屯田御史羅元賓題前事內稱戚畹贍田歲一清查遇有故襲照例遞減

祖制也亦臣衙門職掌也去秋臣條陳六款內有清查遞減之請今查府衛送到親供稽其世次有

應減者二戚焉有應酌議者二戚焉其一爲見
任武清侯李誠銘故武清侯李偉孫也偉係
孝定皇太后懿親推恩封伯晉侯給養贍地七百頃
護墳地六十五頃例也偉之子文全文全之子
誠銘實三世矣誠銘初授都督僉事後叨

皇祖特恩襲封伯爵後晉侯爵然而受田已三世應
減無容議也萬曆三十六年以焚修之說請於
中旨以爲世業夫地土者

祖宗之地土法制者

禮宗之法制豈得徇一人之私請遂以爲常哉况地土有限給賜無窮若使人人如誠銘則將盡天下之地亦不足以給之矣且

宗廟之禮親盡則祧親親之恩原有隆殺

朝廷於誠銘恩禮閱三世至矣盡矣似亦可以少殺之時矣合無照例分爲三世遞減仍着有司徵解庶不至泰侈逾制自徵擾民卽裁抑之中亦寓安全之意矣其一爲見任駙馬都尉萬燁燁

尚

瑞安大長公主贍地二千五百頃今

公主已於崇禎二年正月薨逝其原給贍地似當

照先年

壽陽

延慶等公主事例減一千頃存留一千五百頃第

今邊需告匱或當採臣前疏額內太浮之言以

應存之數作應減之數少濟時訕兼例將來俾

國家收節省之實該戚成退讓之美未必非小補

也此皆應減者也若夫應議者其一爲故永年

伯王明輔乃故永年伯王偉孫也偉係

皇祖元配孝端顯皇后懿親初授都督同知給贍地
五百頃繼封伯爵子棟及孫明輔皆得襲封至
萬曆四十五年又加給地二百頃今明輔於崇
禎元年十月病故無嗣據偉次子左都督松揭
稱職父子曰甘清貧贍地之外絲毫不敢奏討
是以

皇祖俯念寒戚猶下補給之

詔今職侄身故世次雖云三輩後先僅三十餘年比

之諸戚未及一代且

顯皇后輔助

皇祖憂勤四十餘年功在

社稷職雖爲次子然總是

顯皇后親弟非旁枝遠世可比等語臣思

顯皇后徽懿之德尚洽人心戚屬之恩豈宜遽斷弟

王椿乃王偉之次子而明輔之叔也謂之二世

則明輔之承祧置之何地謂之三世則以叔繼

侄名分非宜世次既有變更則隆殺處於兩難

其一爲見任錦衣衛帶俸都指揮同知李誠銘
乃故左都督李文貴之子也文貴父偉卽

孝定皇太后懿親封武清侯而文貴則偉之次子亦
孝定皇太后親兄也蚤年卽世時其子誠銘尚在襁
褓文貴之妻夫人俞氏援先年戚臣李鈺例以
瞻田請

皇祖仰體

太后慈愛照例給地一百二十二頃八十九畝此
特恩也今俞氏身故誠銘繼之乃揭稱母氏陳乞本

爲遺孤誠懇卽始受地之人原是一世未應通
減等語夫地俞氏所請也若以子繼母則誠懇
已在二世之例若爲孤乞地則誠懇允爲始受
地之人旣係

特恩所給卽非常例可衡斯二臣者戚屬雖同情事
則異欲推恩則恐其格於法欲執法則恐其薄
於恩總之臣法官惟知有法耳法旣無成例之
可核則恩豈臣下所敢擅其予奪權衡惟聽之
聖裁而已伏乞

皇上裁察

勅下該部將各戚贍田應存應減酌議妥確覆
請行臣遵奉扣撥等因奉

聖旨贍田遞減自有典例這應減應酌戚臣各與議
覆該部知道欽此又該武清侯李誠銘奏爲贍田
係

皇祖特恩等事內稱前項養贍地土遵奉

神宗皇帝聖旨朕前蒙

聖母特降帑銀於原籍誕生處所蓋造萬壽景命殿

必用護殿地土永遠焚修今本內地土原係特賜
養贍都照例撥給本家着正枝嫡嗣子孫自管業
以供萬年香火之用上彰

皇考仁恩下顯朕誠敬孝心戶部知道欽此是名爲
贍地實則已蒙

欽改爲護殿錢糧伏乞

聖慈勅下該部非同裁減之例等因奉

聖旨該部一併查議具覆欽此又該駙馬都尉萬燁
奏爲照例請減贍田以遵

肅寧內稱臣叨尚

瑞安大長公主賜給贍田二千五百餘頃臣之福

過災生

公主薨逝諸凡典禮該部奉

旨遵行近屯臣條議裁減贍田臣謹查得

壽陽

延慶兩公主事例墓畧裁減一千頃今

瑞安大長公主墳所方擬興工靈匱尚未出府所

有原給贍田伏乞

勅下該部查照

壽陽

延慶公主事例於薨後裁減一千頃等因奉

聖旨准照壽陽延慶公主事例議裁本內贍字體字
錯寫改正行該部知道欽此各欽遵通抄到部送
司隨經移文屯田御史查取四戚親供到司又
奉本部送准左都督王椿揭爲賜地年月未深
等事內稱從來戚臣

后妃之父兄弟侄槩得推恩故及侄明輔之身雖已

三世不蒙裁減尚蒙補給今補給未久而職亦屬

顯皇后親弟於例原得推恩乞准照舊等因到部送司奉批福建司查議奉此案查萬曆九年清查勲戚莊田該本部覆議戚臣如始封本身爲一世子爲二世孫爲三世曾孫爲四世曾孫之子爲五世以今見在官品爲始以今見留地數爲准係二世者分爲三次遞減係三世者分爲二次遞減至五世止留一百頃爲世守之業官因

世降地因官減如正派已絕爵級已革不論地
畝多寡止留地五頃給傍枝看守墳塋之人供
祀仍移文兵部以後戚臣子孫承襲之日將相
繼次序官職品級停革等項移文本部知會查
照今議遞減事例行屯田御史俱照前議每一

官題

請遞減一次等因奉

神宗皇帝聖旨依議行欽此欽遵在案今該前因通
查案呈到部該臣等看得

廷之待戚臣有世及之仁並有裁減之義故贍田
遞減載在

會典胡容素也第恩數有特異事勢有變更偶出
先年建議諸臣意見之外要非常例可得而衡
者不得不費商確焉謹就前款所列一一覆議
查得李誠銘自其祖偉

請給贍地七百頃至今三世未減非例也夫誠銘亦
臣子也非常之恩豈宜久據且我朝

列聖相承世有外戚若皆以誠銘爲口實後將難乎

其繼善乎屯臣之議曰

宗廟之禮親盡則祧夫

天子不能自私其應祧之

祖而况外戚之家有百年弗替者哉則情與法必窮
之勢矣此照例遞減仍歸有司徵解之確案也
第誠銘具疏以爲贍地已改葬

殿香火非同各戚遞減之田奉有該部一併查議
具覆之

上曰謹查得當日

神祖安有將

先朝欽賜養贍地七百頃今作本

殿護殿地給本家正枝嫡嗣子孫自行營業以供
萬年香火之用以後不許援以爲例之

旨旣曰萬年香火又曰不以爲例夫不以爲例者是
明知不可垂以爲訓但奪情於

母后而姑爲是且予且防之深心也總之香火者

禪廟一時之特恩裁減者

祖宗萬世之常憲今若遵依

神廟則贍地已改香火似無容減也若恪遵

祖制則當三世通減應減三分之二該減地四百六十六頃六十六畝有奇應留地三分之一該留地二百三十三頃三十三畝有奇然而未易言也無已則仰體

神祖純孝之心叅酌

祖宗畫一之制量照二世裁減地二百三十三頃三十三畝有奇伏續議通減以期情法兩盡事處兩難合候

聖明裁奪非臣子所敢擅議也又查得見任駙馬都尉萬煒原給贍地二千五百九十五頃八十二畝屯臣謂其原給太濫請以應存作應減之數誠爲有見乃萬煒具疏自陳已奉

明旨准照壽陽延慶公主事例議裁更難復議矣今查得

壽陽

二慶二公主各於薨逝之次年減地一千九十五頃八十二畝存地一千五百頃今煒據例應以

明年爲始裁地一千九十五頃八十二畝存
一千五百頃以遵

明旨者也又查得故永年伯王偉原給贍地五百頃
廕子棟及孫明輔三世未減也而反增於萬曆
四十五年照戚畹封伯例再給地二百頃共七
百頃明輔故而無嗣偉次子見任左都督椿實
承襲之爲棟之弟明輔之叔此屯臣所以議減
而難於二世三世之斟酌也今椿且揭稱身係
顯皇后親弟例得推恩以乞照舊管業抑又過矣夫

遞減例也椿何得獨爲非分之冀也但等減耳
不減於

顯皇后之侄而減於

顯皇后之弟法不得不行而親不得不議也故今日
者論地則爲明輔三世之業論親則復歸於

聖母胞弟乃屬二世之人故就明輔論減則三世爲
正應減地四百六十六頃六十六畝有奇留地
二百三十三頃三十三畝有奇就椿論減二世
爲宜應減地二百三十三頃三十三畝有奇存

地四百六十六頃六十六畝有奇就二者權之二世之減近厚蓋

顯皇后爲四十餘年太平

國母今棟父子絕矣有一胞弟而厚遇焉親親之道也然皆未常有例亦合候

聖明裁奪以便遵行者也又查得見任都指揮同知李誠總故母夫人俞氏原給贍地一百二十二頃八十九畝今俞氏故而誠總謂母氏陳乞本爲遺孤纔止一世未應猶減似矣然備查先年

本部給地原疏則地給俞氏非給誠鑑也今鑑以子繼母正是二世何得謂爲始受地之人照例裁減無疑也然

會典所載有戚臣至五世止留百頃爲世守之業一節卽本部所覆俞氏原疏亦奉有皇親如係后家及有出妃家原賜田土遞減至百頃的並原賜百頃以下的着與存留管業之

旨今誠鑑似當照例減其二十二頃八十九畝仍留一百頃以遵存留管業之例者也總之四戚中

除萬燁李誠銘可據例而裁至如李誠銘至
則事出常情法無正例臣部不得不斟酌擬議
恭候

欽命而行也既經屯臣題議前來相應覆

請恭候

聖明裁定

命下臣部咨都察院轉行屯田御史一體欽遵扣撥
施行

崇禎二年七月十四日具

題本月十七日奉

聖旨戚臣贍田遞減原係

祖制萬煒李誠鋐俱依議李誠銘係

皇祖特恩王椿係

皇祖妣弟屬着照二世例議減便各各該衙門扣撥
施行欽此

題覆科道劉懋梁子璠毛羽健屯田疏

題爲清屯田以贍軍餉廣招選以裕將材事福建
清吏司案呈崇禎二年三等月初三等日奉本
部送戶科抄出刑科署科事右給事中劉懋題
前事等因本年二月三十日奉

聖旨屯田前已有旨舉異才樞臣近亦議及這所奏
清屯餉軍併招選勇士等事該部酌議覆行欽此
又該四川道監察御史梁子璠題爲屯田天下
第一急務乞委專官總理并

勅職守諸臣及時耕作毋誤

國計事等因本年二月二十九日奉

聖旨屯田已屢有旨省直撫按及屯田御史嚴督道府有司自可奏効着通行申飭其專設總理大臣該部還從長確議具奏欽此又該雲南道監察御史毛羽捷題爲海內原有兵食

祖法直須料理祈專責成以圖實效事等因本年四月十五日奉

聖旨營衛兵屯舊制廢弛已久須次第整頓邊才旣

知有人還指名奏來該部知道欽此續該兵部題覆科臣劉懋前疏等因奉

聖旨屯田屢奉明旨未見奏効今後務責成該管守巡道臣凡陞除各官一應操種事宜俱着載入勅書著爲官守俾加意料理蚤期底績你部還與戶部議確行欽此欽遵抄出到部又該兵部將題覆前因備咨到部各送司查得各疏議論雖有差別然總爲屯田足食籲官責成起見相應一併議覆通查案呈到部該臣會同兵部尚書王洽

看得科臣劉懋與臺臣梁子璿毛羽健諸疏總
皆理屯足食之長計也况奉

明旨曰酌議覆行曰還從長確議曰須次第整頓曰
還與戶部議確行臣等安敢草率輕議以負

聖明慎重之意案查先該專理新餉山東清吏司案
呈因科臣汪始亨有酌盈濟虛奉

旨詳奏及兵部覆疏俱蒙

聖明採納允行止於屯田未盡情弊及施爲次第奉
明旨令臣戶兵二部覆議遵該臣等業已面相商酌

詳確於本月初三日具題奉

聖旨這查覈屯田照民田例起科如議兩直行屯田御史各省行撫按勒限奏報仍着汪始亨專管查叅過限奏報不至者題請行催豪右阻撓的照例究處沒田入官兩京九邊止查佃買升科餘俱依議行欽此欽遵是屯田之規模大畧奉有

明旨亦旣詳且晰矣而臺省諸疏意亦盡此如科臣劉懋謂軍丁逃故一切免補免勾着種屯之人照民糧量減起科卽以租銀募本屯丁壯清屯

實伍良爲有見而臣等前議謂兩京九邊止查其佃買者增科而各軍自業者姑免深求此外省直腹裏無論軍種民種俱照民田起科充餉此與科臣之意似已隱合至於

祖宗鹽制商人邊種海支臣部曾於元年條奏申飭已奉

明旨無容再議者也在臺臣梁子璠議謂屯田天下第一急務乞設才望大臣一員專司總理限五年內以效不效爲功罪又乞

各省直撫按及州縣守土官及時舉事清影占具牛
種歲終以所收多寡爲賞罰此自整頓之大綱
任人之良法而臣等前議各省撫按行屯道兩
直屯院行該道且以各府推官理之係兩京者
考成於屯院隸九邊者考成於總督撫按而臣
部亦得覆覈焉業奉

明旨特命科臣汪始亨專管查叅則屯務之責成已
備似亦無容議矣至臺臣毛羽健扼腕於召募
徵調之紛紜期復衛所屯田之永利允屬確論

然所請專責各兵廵道及每歲御史以清過數
目復

命分勤惰爲功罪者與科臣汪始亨之議似無異同
且屯清軍自清可以守可以調則臺臣原疏所
謂從衛所中尋食糧之兵不從窮民上議加兵
之糧亦可次第整刷而所稱五利者不出此矣
總之科道劉懋等諸疏與前科臣汪始亨之疏
雖曲折不同要已括盡屯務始終之槩臣部與
兵部前所議覆與今所議覆雖再四商確要皆

不出前疏經緯之中目今屯務惟在力行臣等
安能更贊一詞也蓋古稱方策之政人存則舉
今臣等所議者皆方策之政耳若丹心做事鐵
面相成無令嘔心之成議爲畫餅之空談則當
事諸臣實身任焉臣等謹合詞以

請伏乞

命下臣部移文一體着實遵奉施行

崇禎二年八月二十四日具

題本月二十七日奉

聖旨是欽此

閩省起解錢糧盡被奸委侵沒疏

題爲閩省起解錢糧盡被奸委侵沒懇乞

聖明嚴加申飭催提解官以速完

內供事福建清吏司案呈案查福建一省每年額
解甲字庫顏料本色銀硃一千七百四十七斤
紫草四百二十斤黑鉛一千一百九十五斤四
兩二硃五百二十四斤五兩三錢三分三釐三
毫五倍子五百三十一斤八兩烏梅四千一百
六十二斤丁字庫本色桐油五千一百六十斤

黃熟銅一千三十七斤四兩黃蠟一千一百斤
十二斤錫一千五百九十斤一十二兩生漆一
萬一百六十六斤一十四兩水牛角三百一十
三副除天啓二年完納不開外查得節年福建
撫院疏抄類報天啓元年差官唐猗起解未到
天啓三年分冊報差官福州右衛前所千戶劉
茂根起解未到天啓四年分冊報差官福州左
衛中所千戶陳尚贊起解未到天啓五年分冊
報差官福州左衛千戶朱國臣起解未到天啓

六年分冊報差官福州中衛百戶嚴時泰起解
未到天啓七年分至今崇禎二年止俱尚未報
起解又每年額解供用庫蠟茶本色黃蠟一萬
二千五百五十四斤白蠟一萬六百五十斤本
色芽茶五千一百斤本色葉茶四千斤除天啓
三年以前已完不開外天啓四年分上半運差
官孫賢完納訖其下半運鄭應登起解黃蠟完
過四千六百五十二斤欠一千六百二十五斤
白蠟完過五千一百七十六斤欠一百四十九

斤芽茶完過二千五百五十斤葉茶完過一千
五百二十八斤欠四百七十二斤天啓五年分
據疏報上半運差福州左衛千戶徐繼祖起解
下半運差官巡簡周之臣起解俱未到自天啓
六年以後俱未起解已經節次呈堂咨催去後
至今錢糧未到並回文亦無等因通查案呈到
部該臣等看得

內庫錢糧係

上供急需省直完欠乃藩司責任其未報起解者或

欠在民間或貯在官庫雖云稽緩猶有著落者
天啓元年以至三四年間業已報起解矣
然解於何地乎今細查各委解官非千百戶之
奸弁則經歷巡簡之么麼以

朝廷之物力小民之脂膏輕付此輩八九年竟無下
落是該省之差委不明也且八九年內錢糧不
完批廻不掣不一稽查是該省之法紀全弛也
至本部文移屢催舌敝頽禿而竟不一照管是
臣部與該省之紀綱法度俱無一存者也不知

此六七解官者有何神通臣部欲問而鞭不及
腹該省八九年任其狼吞而並不一問恐日復
一日該省起解正供錢糧盡化爲烏有也曾謂
復有三尺哉旣經該司查呈前來相應題

請伏乞

天語叮嚀嚴加申飭

命下臣部咨行福建撫按責成該省布政司將天啓
元年及三四五六年已經申報起解各官速差
的當人役務限今年以內盡數押解前來完納

如違限不到者定行叅處天啓七年以後爲期
已久如何杳無徵解之期亦宜勒令速徵起解
完納以充

國用

崇禎二年九月初一日具

題本月初四日奉

聖旨庫內錢糧上供急需節年起解未到該省全不
照管成何法紀着該撫按督行布政司速差的當
人役務查領解各官着落通限年內盡數押解完

康永泰
納解官治罪不宥年內不到者布政司官并行叅處其未起解的各照年分速徵解納不得再稽該衙門知道欽此

覆屯院李玄清釐屯政疏

題爲屯政積蠹已深清釐須奉

天語謹摘緊要三款仰祈

聖明允行以佐

國儲事福建清吏司案呈七月二十四日奉本部
送戶科抄出巡按直隸等處監察御史李玄題
前事內稱清理屯田之法緊要有二其一在丈
勘蓋屯田與民地不同民地有定冊定糧定主
屯田則開墾任人報首任人買賣佃代任人且

軍民新舊之貫址不一莊田護墳之替換不一
此中最易隱漏影占若非逐段清丈則兼併埋
沒不知幾十萬頃然丈勘之法先開出首免罪
之門令投獻官宦併隱占軍民各將歷來未登
報田土開具實數認糧登冊卽以其地永爲世
業其罪一槩不究有能訐首投獻隱占者查勘
的確亦以其地歸訐者認糧登冊永爲已業而
罪坐原主仍追漏糧備邊又令種屯之家各將
畝數尺寸明寫一木牌插于本地之內委官覆

丈冒取一牌查其多餘者沒田追糧此提綱挈
領之法也其一在增科

祖制開墾荒蕪田地三年後起科定以上中下三等
每畝或三分一二分不等各隨地之肥磽而輕
重布之載在

會典可按也視祖傳老地每畝五六分七八分甚
至一錢餘者多寡懸絕總之至于減少以誘人
之開墾不謂至今日而年限生熟不論槩以一
分起科查附京州縣衛所間有三分二分者山

東河南絕未之聞其肥瘠亦大偏矣無惑乎奸猾之民將祖傳之老地拋棄不耕混入荒蕪數內復認墾荒之名以避重就輕之紛紛也今除原舊三分起科者免查外合無行令該管道府衛所各官備查開荒年月畝數凡過十年以上其地已熟者准照鄰畔老地之例減半增科多不過三分登冊徵納其中有沙鹹坍塌出沒非常者取具里鄰甘結仍舊以一分爲則此酌盈濟虛之權也伏祈

皇上勅臣衙門轉行該管官員擇廉勤素著者遵照
臣之前說着實舉行事竣之日報出地百頃以
上者獎異紀錄千頃以上者題

請優擢而增科多寡亦以是爲差又祈

皇上嚴諭官民人等但有勢豪阻撓挾制委官以抗
明旨者許臣以白簡從事指名拏奏等因本年七月
十七日奉

聖旨屯政清理得宜方有實効且不擾民這條奏丈
勘隱占及分別起科等事該部確議具覆欽此欽

遵抄出到部送司案呈到部該臣等看得屯田
李玄所議屯田乃民屯而非軍屯也民屯逐時
開墾荒熟不常苦無定額而隱匿稅糧者亦復
不少屯臣意在闢草萊充

國計所爲有激乎其言之也夫民屯之弊展轉流
徙不可勝窮隱漏影射不可勝詰惟是地畝具
在頭緒不難尋也然而不能尋者其一在久假
者之貪利而不肯出首其一在欲出首者之畏
法而不敢直認其不敢直認者在寬一面以勸

之則屯臣所謂開出首免罪之門者是也夫出
首者免罪認糧遂得而世業焉是民之未出首
與旣出首者其享地之利同止是認糧些須遂
爲恒產誰其愚頑而不降心以相從也在久假
不出首者懼失地耳今見出首者之世其業隱
占者之罹于刑訐首者之不吾貸利害曉然卽
甚猾之民亦必爭相出首此屯臣所謂能訐首
者罪坐原主而地歸於訐者此又以法度悚之
而善廣其出首免罪之門者也屯臣又有簽挿

奉牌委官吏勘之議夫地必經界正而始清
插木牌則地段分明固已犁然井然於阡陌之
間矣且不履畝逐段而聊取一二以抽丈之此
又扼要而不至擾民法之善者也屯臣疏內又
有增科一款謂開荒地過十年以上已熟者增
科多不過三分其沙鹹坍塌出沒不常者仍以
一分爲則此又

祖制定上中下之三等而輕重布之者也至于獎異
優擢以待廉勤任事之臣白簡從事以彈豪猾

挾制之奸此屯臣所矢心供職亦臣部所屢經
條議俱宜亟見施行者也總之是舉也以出資
爲大端以訐首佐之以清丈之法慎用之以優
擢白簡之法懲勸之至于增科以三等之法酌
用之實心實政從頭做去未見屯政之不立舉
國用之不漸足者也旣經題議前來相應依擬覆
請恭候

命下臣部移咨都察院轉行屯田御史申飭所屬道
府州縣衛所等官着實遵奉施行

崇禎三年十月初一日具

題本月十一日奉

聖旨民占軍屯自應按籍清查悉照民田起科以釋
國用至民墾荒地正宜廣示招徠查果成熟十年
以外酌量增科許爲永業且不必清丈滋擾該衙
門知道欽此

題覆閩撫平夷用過錢糧疏

題爲再詳臣鄉撫寇情形并陳善後管見懇乞

聖明發部覆

請仍下撫按議確以靖東南事福建清吏司案呈案
查崇禎元年七月初一日奉本部送戶科抄出
河南道監察御史蘇琰題前事內稱庚申年閩
庫失火從灰燼揀出原貯備倭銀三十一萬及
差工部主事劉曰珩取助

大王而布政司回文則云爲癸亥年擒紅夷

獻俾費去二十八萬有奇只剩二十二萬有奇

劉主事夫癸亥年冬臣鄉之擒紅夷實用生員
陳則賡之計以杯酒誘之當時主其事者都督
謝弘儀就令恣意花銷不過一二萬而止其餘
所侵欺者不可吐還以飽閩兵乎更有臣鄉州
縣奉文派助遼餉夫遼急而閩安則助遼爲義
閩令急矣以加派助遼者留之閩中等因本年
六月二十五日奉

聖旨這事情已有旨三省撫按官相機處置覽奏

款水陸合援是確論中左內地澎湖要害更當
守未可輕議俘獻紅夷借動庫銀十八萬着撫按
嚴查回奏務求着落其俞咨臯離汛失守罪在不
赦仍速提正法不得借端觀望延緩該部知道欽
此欽遵抄出到部送司除疏內水陸合援等議
聽兵部議覆請留遼餉一節已該臣部將該省
七年雜項新餉覆

允借用訖其俘

獻紅夷借動庫銀相應咨撫按遵

有查奏等因奉聖鑒查去後至崇禎三年三月
總督倉場本部右侍郎南居益奏爲微臣因勞
賈罪忤奸見抑謹陳閩事始末仰希

聖鑒更乞

皇上南顧海邦終臣愚計以永奠南服事內稱天啓
三年臣巡撫福建時紅夷作亂苦於軍興無資
因前撫臣商周祚題動布政司庫存積銀兩復
綴詞

上請奉

旨准照前動支臣與前按臣喬承詔選練兵卒製造
舟器生擒夷首俘獻

闕下一切善後事宜備細條陳具題奉

旨下部已久其用過餉銀先後四年間據布政司開
報逐年逐項有總有撒共用過銀一十七萬七
千有奇以彼軍興之大爲時之久銖銖兩兩給
放支銷皆經原任左布政使陸完學之手臣於
復

命之日已具疏奏銷至臣條畫善後諸款或亦可以

少府驛場亦乞酌議具覆其用過庫銀查照原冊覆覈請銷等因本年三月十八日奉

聖旨南居益剿夷制勝著有成勞並有功將士着遵前旨查敘善後事宜並與議覆用過庫銀覆覈請銷該部知道欽此欽遵抄出到部送司案查督部撫閩時題有條議澎湖善後事宜等事其十款內惟增餉屯田二款係本部職掌已經呈堂題覆通行訖至于平夷用過庫銀一並行本省撫按查奏咨催去後至今崇禎二年七月內該巡

撫福建右僉都御史熊文燦奏同前事內稱行
據福建布政司呈該左布政使吳國仕右布政
使周泰峙按察使陸之祺巡海道副使徐日久
會看得紅夷爲惡幸前撫相繼綢繆募兵選將
制船造器多方經畫始獲

獻俘計先後四年而底定其用過錢糧先經商撫院
題

請動支後經南撫院

奏繳銷算今復

命職等以查覈職等取文冊之見存者逐項磨算太
都呈請則有道將給放則有府館而事不屬於
一手或爲新兵之月糧或爲舊兵之行糧或以
制造船隻或以增修器械或以優給賞恤條分
縷析各有着落等因呈詳到臣該臣看得天啓
二年紅夷作亂其占據我彭湖要地虜掠焚燒
民不堪命得前兩撫臣商周祚南居益相繼剿
除獻俘

闕下至今功稱底定使狡夷無敢起窺伺之心皆賴

此大創之力也但用兵必用餉茲據司道諸臣
已逐款磨算而臣與按臣復照冊清稽俱一
不爽者惟是臺臣杯酒誘擒一段非無所見而
云然也蓋當其擒之一時與誘之一術不能無
借於杯酒其費幾何而不知撫臣南居益受事
兩載以來親犯波濤躬冒矢石遣將募兵造船
置器賞功恤死另有一番不得已之費此惟身
在局中者分毫知有歸着而議在局外者始終
不無揣摩嚴查已有着落覆覈正宜請銷謹會

同巡按福建監察御史張三謨細加覆覈
商周祚用銀五萬四百四十八兩八錢五分
釐南居益用銀一十二萬六千六百一十三兩
九錢七分五釐六毫共用過一十七萬七千
十二兩八錢二分六釐六毫造冊進

覽等因本年七月二十七日奉

聖旨該部知道欽此本年九月二十四日戶科抄
巡按福建監察御史張三謨奏同前事等因奉
年九月十九日奉

聖旨該部知道欽此欽遵各抄出到部送司通查案
呈到部該臣等看得閩中紅夷之役據島啓稱
東南瀕危積有年載賴原任撫臣今任倉場總
督本部右侍郎南居益繼前撫臣商周祚後力
請勦除生擒夷酋高文律等獻俘

闕下而後拆毀夷城蕩掃餘氛已經巡按御史姚應
嘉勘功題敘新經兵部覆疏見在

御前非臣部所敢置喙者也惟是用過軍餉錢糧一
節係臣部職掌查得當日剿夷用過閩庫備極

銀冠後共計一十七萬七千餘兩臺臣查
今日之匱詘而追憶曩時之積蓄以局外之限
界而深惜局內之虛靡亦爲

國節用一段苦心也但查當年居益撫閩事竣曾
經冊報奏銷在案今又據該省撫臣熊文燦會
同按臣張三謨督同布按司道諸臣吳國仕等
備查前來顛末已晰內稱南撫臣當日用過錢
糧逐項磨算大都呈請則有道將給放則有府
館或爲新兵之月糧或爲舊兵之行糧及造船

脩器優給恤賞總計別撫臣商周祚任內用過銀五萬四百四十餘兩後撫臣南居益用過銀十二萬六千六百餘兩夫以軍興大役首尾閱歷共計四年曠日持久雖云所費如許然而卒令紅夷遁跡澎湖肅清其功能已見於天下矣原非徒以杯酒成功而遂僅於几筵間計費也今撫臣與按臣會疏入

告內稱司道諸臣已逐款磨算而撫按二臣復照冊清稽俱一一不爽是前項錢糧固已覆覈精詳

銷算周密不煩再爲擬議矣
奏前來相應覆

請合候

命下臣部咨行福建撫按將前平夷用過錢糧仍照
原行冊案開銷施行

崇禎二年十月初十日具

題本月十四日奉

聖旨是欽此

題復捕營口糧鹽菜疏

題爲照例請討窩舖并日支行糧鹽菜事福建清吏司案呈奉本部送准兵部咨稱該本部題前事等因奉

聖旨捕營晝夜巡警鹽菜蘆席料草等銀一體均給該部知道欽此欽遵咨會到部隨該本部移取捕營軍馬數目以便給發去後續准兵部咨同前事內稱職方清吏司案呈准京城內外巡捕提督鄭其心手本開稱日支口糧鹽菜馬匹料草

數目兩營擺守巡緝官軍親兵家丁何應奎

一萬一千四百七十二員名俱自本年十一月初七日起至二十六日止每名日支本色口糧二升共支糧四千五百八十八石八斗每名日給鹽菜銀二分共支銀四千五百八十八兩八錢官軍張平等下馬二千九百四十二匹并未收月給錢糧見在營當差馬四十匹共馬二千九百八十二匹俱自本年十一月初七日起至二十六日止每匹日給料草銀三分共支銀三

千七百八十九兩二錢再照料草此時騰貴給
無照大營馬匹改給本色其口糧大營各軍每
日米二升鹽菜銀自十七日起加給五釐俱應
比照支給擬合回覆等因到司准此看得捕營
官軍俱自本月初七日分派信地晝夜防守委
與城守官軍一體旣奉

聖諭額外日給行糧鹽菜蘆蓆料草今三大營軍馬
已經支給捕營軍馬似應一例支給不容迥別
既經捕營造冊前來相應移會案呈到部咨類

查照速給等因咨冊到部送司奉批糧草
不敷仍通給折爲便卽行給發仍酌議具題奉
此又奉本部送准巡視京營禮科給事中陳養
化雲南道監察御史樊尚燝手本爲請討口糧
鹽菜以恤巡軍事照得三大營各軍守城列營
爲役不一而口糧鹽菜莫不題給昨本科院以
夜巡視內地而捕管各軍把守巷口列營要地
見各軍啼饑號寒咸謂三大營各軍口糧鹽菜
已撥三四次獨捕營未沾誠可憐憫倘或一

同仁乞速劄庫將應得口糧鹽菜照例晉給
因到部送司通查案呈到部該臣等看得三大
營各軍守城列營以資捍禦其口糧鹽菜業經
從優題給矣至于捕營各軍或把守巷口或列
營要地晝夜巡警勞苦可念旣奉有鹽菜料草
一體均給之

旨自當照數支給及查大營官軍原議鹽菜銀二分
後復量加料草遇警則支本色此大營兄支之
例也但守城之軍與守巷之軍勞逸稍異且

兵四集料草匱乏安能遍給似不得不量爲減
酌合無將捕營各軍口糧每名每日照例給米
糧米二升鹽菜銀止給二分不必議加其料草
仍支折色銀三分庶支給得宜而捕營官軍亦
免啼饑號寒之苦矣除一面照冊先行太倉銀
庫將鹽菜料草銀六千三百七十八兩支給外
然必題奉

明旨庶知恩典出自

朝廷且與三大營亦免厚薄異同之嫌也相應題

請恭候

命下臣部遵奉施行

崇禎二年十二月初二日具

題本月初三日奉

聖旨這捕管軍糧鹽菜料草酌給本折依議行該衙
門知道欽此

進宮銀兩題 請寬限疏

題爲進

宮銀兩期迫道途阻梗爲艱懇乞俯允題

請寬限以甦困苦事福建清吏司案呈准屯田御史

李玄手本前事內稱據順天府管糧通判曾賜

昌呈稱府屬二十七州縣并各京衛每年例有

進

宮錢糧於十二月二十三日恭

進邇緣逆虜犯順殘破地方軍民受害非惟野無

所掠亦且房室盡空至如順義王田三河各
城池一空士民大半逃亡大宛二縣及各京衛
雖在

輦轂人民惶亂暫難徵輸通州良鄉昌平涿州香河
武清等縣亦非寧謐之地霸州永清東安保定
寶坻懷柔等縣雖安堵如故奈值戎馬踐郊起
解爲難切念職業專司若不預爲呈鳴恭
進稽悞職罪難逭合無俯將進

宮銀兩限期暫題寬假分晰議解等因又據燕山左

等衛親軍指揮使司掌印經歷等官張文學等
呈爲東南被虜慘不忍言進

官等項錢糧萬難措辦乞賜代題寬限事切照在
屯衛每年例有進

官銀兩值今徵收之際虜酋臨城搶掠殺戮野無人
烟屯官在京者不能出在外者又不能入

欽限期迫代乞具題寬限俟虜退另期恭

進等因各呈詳到院該本院看得順天真定保定

河間順德廣平等六府及京衛每年例有進

宮銀兩解部類齊於十二月二十三日未

進此保

欽限誰敢隕越本院業奉堂劄已檄行各道及各該
府管糧官督催完解實無虛日無奈逆虜犯順
橫行搶掠州縣在

畿輔之東者皆遭殘破而逃散半空其在

畿南者道路梗阻而聞問不通在京在外俱兩受

其困矣本院念此項錢糧係

大內之供例不可緩而數不可缺但事出非常法難

膠故印各州縣徵收在庫亦不敢犯險而來
衛各官欲求寬限固凜于職掌之難追亦時勢
之不得不然也煩爲查照呈堂具題量寬時日
俟地方稍寧如額解進庶錢糧不致他虞矣等
因又奉本部送據順天府呈同前事內稱准本
府督糧通判曾賜昌牒稱將進

官銀兩限期請暫題寬假等因備牒到府該本府看
得第一喫緊錢糧莫如進

官銀兩限期請暫題寬假等因備牒到府該本府看
得第一喫緊錢糧莫如進

不可得而欲責其按期不亦難乎第大宛之
與在京各衛豈無分文交納倘一槩緩徵必有
乘機侵用相應責令原催人役見在銀兩速行
解府令無呈乞俯念糧官緣值時勢所阻實非
慢事請爲具題暫寬限期俟虜平催解等因到
部送司查得順王等府燕山左等衛每年該解
乾清等官子粒銀共四萬七千七百七十四兩四錢
七毫五絲四忽一微一纖例應十二月初旬解

部

欽定於十二月二十三日恭進

內庫交收今崇禎二年分銀兩本司照例呈堂繳
催四次而各府俱未報解但今時事倥傯逆虜
肆掠委難馳解既經屯院及順天府查議前來
合無依議具題等因呈奉堂批卽具題奉此案
呈到部該臣等看得進

宮銀兩係

內廷之需設有定額立有

欽限不特額數毫不敢缺而亦期不可踰者也但今

逆奴孔熾戎馬橫郊近在

畿輔者已遭蹂躪而驟難徵解遠在遐方者雖已
完固而何能飛越見今臣部屢經檄催然猶不
無齎盜之恐則屯臣與府臣事平類解之議固
時勢之不得不然亦實萬全之完謀也既經該
司具呈前來相應題

請恭候

命下臣部咨行都察院轉行屯田御史并劄行順天
府將進

宮銀兩火速徵完貯庫俟地方稍寧一併解部類
進

崇禎二年十二月十八日具

題本月二十日奉

聖旨是事平卽行催進欽此